

Dithero tsa Tirelano mo Kutlwanong

09/2015 Thero ka Sontaga wa 01 morago ga moletlo wa Epifaniya, e le ka 11. 01. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Baroma 8:14, le re: **"Gonne botlhe ba ba gogwang ke Mowa wa Modimo ke bone bana ba Modimo."**

1. Sefela sa - - 207/ -

2. Thapelo: -Morena wa lorato lo lo sa ka keng lwa lekanngwa le sepe, ke wena yo o ratileng batho botlhe mo lefatsheng. Re fano go utlwa Lefoko la gago. O re fe Mowa o o Boitshepo wa gago gore o kabolole ditsebe tsa rona, re utlwe bosupi ka ga Morwao Jesu Keresete, Mopholosi wa rona le batho botlhe ba ba tswang mo ditšhabeng. Baakanya dipelo tsa rona gore di ngaparele Jesu Keresete, re tle re fitlhe mo kgalalelong ya legodimo ka ene Jesu Keresete, Morena wa rona. Amen

3. Lefoko la Testamente e kgologolo le kwadilwe mo go Jesaya 42:1-9;

Epistolo ka fa thulaganyong ya 2 e kwadilwe mo go Baroma 12:1-8;

Efangele ka fa thulaganyong ya 3 e kwadilwe mo go Matheo 4:12-17.

4. A go ipolelwe tumelo ya bokeresete!

5. Sefela sa 86 - 80/83

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Matheo 3:13-17, e re: "Jaanong Jesu a tswa kwa Galelea, a ya kwa go Johane kwa Joretane gore a kolobediwe ke ene. Mme Johane a re o a gana, a mo raya a re: 'Ke nna ke tshwanetseng go kolobediwa ke wena, mme a o tla go nna?' Jesu a mo araba a re: 'Letlelela go nne jalo; gonne go re tshwanetse jalo gore re dirafatse tshiamo yotlhe.' Ke fa a dumela. Ya re Jesu a sena go kolobediwa, a tswa mo metsing ka bonako. Foo magodimo a mmulegela, a bona Mowa wa Modimo o fologa jaaka lephoi, o tla mo go ene. Mme lentswe la utlwala, le tswa kwa magodimong le re: 'Yoo ke Morwaake yo o rategang, yo ke mo itumelelang.'" Amen.

8. Thero: Phuthego e e rategang ya Morena wa rona Jesu Keresete, kajeno ke Sontaga wa ntlha morago ga moletlo wa Epifania. Ka moletlo wa Epifania le ka Disontaga tse di o latelang re gopola bogolo gore Morena Jesu o senoletswe baditšhaba. Ka Efangele ya Sontaga o o fetileng ra rerelwa ka ga batlhalefi ba ba neng ba tlile go bona Jesu ba tswa kwa botlhabatsatsi. E ne e le ba ntlha ba ba neng ba dule mo go baditšhaba ba ba tlileng go bona Jesu, ba mo obamela, e bile ba senolelwa kgalalelo ya Modimo e motho a sa ka keng a e bona ka thata ya gagwe. Batho ba Iseraele ba ne ba lebeletse go tla ga Mesia yo o neng a solofediwa ke Modimo ka baporofeti mo Testamenteng e kgologolo. Mme ya re a sena go tla, ga ba a ka ba mo itse, le e seng go mmona ka thata ya bona. Le bona batsadi ga ba a itse go mo senolela mo bathong, gone batho ga ba a amogela bosupi jwa bone.

Mo Efangeleng ya kajeno re utlwa ka fa Modimo ka osi o supileng ka ga Morwaaona mo go Baiseraele gore ene a simolole tiro ya gagwe mo ponatshegong. **Modimo wa mmonatsa ka go paka le go supa ka ga gagwe**

1. Ka mafoko a ga Johane Mokolobetsi;
2. Ka Mowa o o fologetseng mo go ene jaaka lephoi;
3. Ka Lefoko la ona le le tswang legodimong.

1. Modimo wa bonatsa Morwaaona ka go paka le go supa ka ga gagwe **ka mafoko a ga Johane Mokolobetsi**. Modimo ka osi wa roma Johane gore e nne mmakanyetsi-tsela le mokedi wa ga Keresete. E rile Johane a ya kwa sekakeng, a simolola tiro ya gagwe ya go mmaakanyetsa tsela. Thero ya gagwe ya tshikinya batho botlhe mo tikologong ya Joretane le Jerusalema le mo Jutea, ba simolola go phuthegela fa go ene. Ga bonala gore Johane o ne a rera gantsi ka mafoko a a reng: Tlhabologang, gone puso ya Modimo e atametse. Go a utlwala gore Johane o boleletse batho gore ene Mesia o gaufi. A ba gakolola gore ba ungwe maungo a a tshwanetseng tlhabologo gore ba nne mo kemong e e kgatlang Modimo. A ba gakolola gore ba se ka ba solofela Aborahame ka go nna bana ba gagwe fela ka fa nameng, a re: Mesia o tla latlha botlhe ba ba sa rateng go tlhabologa, o amogela bona fela ba ba tlhabologelang mo pusong ya gagwe.

Mo malatsing ao Morena Jesu a tla fa go Johane kwa Joretane, a kopa gore le ene a kolobediwe ke Johane. Mme Johane a senolelwa ke Modimo gore a itse gore yo o buang le ene ke Mesiya yo o boitshepo yo o se nang boleo. Ke fa Johane a supa ka mafoko, a re: "Ke nna ke tshwanetseng go kolobediwa ke wena, mme o tla mo go nna?" Ruri ga go na pelaelo gore botlhe ba ba utlwileng mafoko ao a ga Johane ba ne ba simolola go botsa gore kana yo ke mang? E ne e le tsela e Modimo o mmonaditseng ka yona fa pele ga Baiseraele gore ke gona Jesu a simololang tiro ya gagwe mo gare ga bone. Mme Jesu a gakolola Johane Mokolobetsi, a mo raya a re: Letlelela gore go nne jalo gore go dirafadiwe tshiamo yotlhe. Johane a utlwa Lefoko la Morena, a kolobetsa Jesu ka kolobetso ya tllhabologo. Kana ene yo o se nang boleo, a ipolela boleo jwa batho, e kete e le jwa gagwe go supa, fa a ne a ineela go kaiwa moleofi yo o tshwanetsweng ke loso gore batho ba amogele tshiamo ka ene.

2. Modimo wa bonatsa Morwaaona ka go paka le go supa ka ga gagwe **ka Mowa wa Modimo o o fologetseng mo go ene jaaka lephoi**. E rile Johane a sena go dira ka fa Jesu a mo laetseng ka teng, le go kolobetsa Jesu, Jesu a tloga mo metsing ka pele. Ke fa Modimo wa supa, wa paka ka tsela e nngwe ka ga Jesu: Magodimo a bulegela Jesu, Mowa o o Boitshepo wa fologa jaaka lephoi, wa tla mo go ene. Ga re itse gore batho ba ba neng ba eme fale ba rileng ka ga se ba se bonyeng, mme re ka solofela gore ga ba a ka ba didimala ka tirafalo eo. Go tla ga Mowa o o Boitshepo o o neng wa fologela mo go Jesu jaaka lephoi go supa kutlwelobotlhoko le kagiso tse di tswang legodimong, di tla lefatsheng ka ene Jesu. Kana re gopola lephoi le le fa go Nowa ka nako ya morwalela, la supa bokhutlo jwa morwalela o o neng wa tlisa tatlhago mo bathong. Gape re le bona fa ditlhabelong tsa molao wa Baiseraele gore motho a bone kagiso ya segakolodi sa gagwe. Ka moo re ka supa jalo gore ponalo ya lephoi mo kolobetsong ya ga Jesu e supa kutlwelobotlhoko le kagiso ya Modimo tse di tllileng lefatsheng ka Jesu Keresete. Batho ba ba amogelang Morena Jesu, e bile ba amogela kutlwelobotlhoko le kagiso e e tswang Modimong, e re e abelwang ka Efangele. Yo o amogelang Efangele, e bile o amogela bopaki jwa Modimo ka ga Morwaaona.

3. Modimo wa bonatsa Morwaaona ka go paka le go supa ka ga gagwe **ka Lefoko la ona le le tswang legodimong**. Modimo Rara o tswela go supa le go paka ka ga Jesu. Re utlwa ga tse: "Mme lentswe la utlwala le tswa kwa magodimong le re: 'Yo ke Morwaake yo o rategang, yo ke mo itumelelang.'" Ga go na pelaelo, batho botlhe ba ba neng ba eme fale, ba utlwa Lefoko leo. E bile ga re belaele gore Modimo wa bua ka Lefoko le le utlwaletseng mo bathong gore ba le utlwe, ba le tllhaloganye. Bopaki jo jwa Modimo e ne e le thuso e kgolo mo go

Baiseraele ba ba neng ba phuthegetse fale gore ba tlhaloganye ka nako eo gore yo o emeng fa gare ga bone ke mang. E rile fa Johane a supa pele ga Jesu, bana ba Iseraele ba simolola go botsa gore Yoo go ka nna mang? Ya re legodimo la bulega, Mowa wa Modimo wa fologa jaaka lephoi, batho ba tswelela ba botsa gore yo o ka nna mang? Ke fa Modimo wa araba ka gore yo ke Morwaake yo o rategang yo ke mo itumelelang. Ke ona mafoko a Modimo o mo senoletseng mo bathong ka ona gore botlhe ba itse gore yo ke Morwa Modimo yo o rategang.

A ga se gore re ka lemoga lorato lwa Modimo ka mafoko ao. Kana rona batho re fularetse Modimo, mme ona ga o a ka wa rekegela Morwaaona, mme a mo neela go nna thuanho ya rona. Se se makatsang ke gore ke lona Lefoko le lekgotla la Baiseraele la mo atholelang loso ka ntlha ya lona, la re: Yo o itira Morwa Modimo. Kana ga ba amogela bosupi jwa gagwe, jalo ba latlhegelwa ke pholoso ya bone. Mme ba ba mo amogelang, ba amogela le pholoso e e tswang mo Modimong ka ene Jesu.

Go jalo kajeno: Keresete o sa ntse a bonadiwa mo lefatsheng lotlhe gore ke ene Mopholosi wa batho botlhe, a supiwa ka Lefoko le disakaramente. A Morena a re thuse gore re amogele Keresete gore go tlotlwe le go bakwe Modimo! Amen.

9. Thapelo: Morena, re a go leboga, gonne re utlwile Lefoko la gago. Re a go leboga, gonne o sa ntse wa re laletsa ka Efangele, re tswe mo lefifing, re tsene mo kgalalelong ya gago. O re fe Mowa o o Boitshepo wa gago gore re amogele bosupi le bopaki jwa gago, re dumele mo go ene yo o supilweng, fa e le Morwao yo o rategang le Mopholosi wa batho. Re thuse gore re amogele lorato lwa gago lo lo bonetseng go rona, re nnele ruri mo go lona, le lona lo nne mo go rona, re se kgaogane. A go nne pako le tlotlo go wena, Rraetsho, ka ene Jesu Keresete, Morena wa rona. Amen.

Thapelo ya Morena: Rara wa rona yo o mo legodimong ...

10. Sefela sa 261 - 243/253

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke I. Dube (+), ka ngwaga wa 1975/1997/ 2009/2014 August 2014. Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.